

(գրախտաբնակ) եւ «Եւթ», մականունն է ար-
ժանացել: Դեռ հէքեաթներից գիտենք, թէ
ինչպէս Շահաբբասը գիշերները ծպտեալ իր
վէզիրների հետ շրջում էր քաղաքներն եւ
գիւղերը՝ ժողովրդի վիճակին վերահասու լինելու
համար, ինչպէս անում էր Հարուն-էլ-Ռաշիդը
իր Զաֆար վէզիրի հետ: Սակայն Առաքել
վարդապետը նկարագրում է նրան բոլորովին
այլ գոյներով, իբրեւ «անդնդային վիշապ, օձի
բնաւորութիւն ունեցող, իբրեւ մի աշխարհ-
աւեր եւ բռնակալ մարդ եւ խիստ ֆանատիկ
մահմետական ու հալածող քրիստոնէութեան»:
Ներկայ դէպքում մի քիչ սկիստօրէն պէտք է
վերաբերուել թէ՛ Առաքել վարդապետի եւ
թէ՛ մահմետական պատմագիրների կարծիքին.
առաջինը՝ հայ ազգին հասած աղէտների պատ-
ճառով կարող է դառնացած լինել Շահաբ-
բասի դէմ եւ հետեւաբար ոչ անաչառ, իսկ
մահմետական պատմագիրները՝ ոգեւորուած լի-
նելով կրօնական զգացումներով, նոյնպէս չեն
կարող անաչառ պատմիչ հանդիսանալ եւ
միակ այն հանգամանքը, որ Շահաբբաս ջար-
դել եւ կոտորել է գեավուրներին, բաւական է
մոռացընել տալու նրա բոլոր պակասութիւն-
ները: Դիմենք ուրեմն նաեւ ուրիշ պատմա-
գիրների:

Մի նոր պարսիկ պատմաբան, որի երկա-
սիրութիւնները դեռ անյայտ են մնացած, բայց
որին կարելի է կատարելապէս հաւատ ընծայել,
որովհետեւ նա իր խօսքերն հիմնում է դիւա-